

आकाशवाणी जयपुर-अजमेर
प्रादेशिक समाचार

दिनांक 07.08.2025 समय: 18.45 बजे

- प्रधानमंत्री नरेन्द्र मोदी कह्यो-सरकार किसानों की आमदनी बधावण अर खेती-बाड़ी रो खर्चो कम करण सारु लगातार कोशिश कर रही है।
- उपराष्ट्रपति चुनाव सारु चुनाव आयोग अधिसूचना जारी कीनी-21 अगस्त ताई नामपाना दाखिल कर्या जा सकेला।
- मुख्यमंत्री भजनलाल शर्मा हर घर तिरंगा अभियान ने देश ऊं लगाव बधावण सारु जरूरी बतायो।
- प्रदेश मांय ई चौमासा मांय हाल ताई सामान्य ऊं 69 फीसदी बत्ती बिरखा व्ही।

000

प्रधानमंत्री नरेन्द्र मोदी कह्यो है के सरकार किसानों की आमदनी बधावण अर खेती रो खर्चो कम करण सारु लगातार कोशिश कर रही है। वे आज नई दिल्ली मांय एम.एस. स्वामीनाथन शताब्दी अंतर्राष्ट्रीय सम्मेलन मांय बोल रह्या हा। श्री मोदी कह्यो के देश की बरकत की बुनियाद किसानों की ताकत है। वे कह्यो के डॉक्टर स्वामीनाथन भारत ने अनाज की उपज लेवण रा मामला मांय खुद रे पाण ऊबो करण रा आंदोलन की अगुवाई करता थकां जैव विविधता ऊं आगे जैव-खुशी रो विचार दीनो। श्री मोदी कह्यो के पीएम किसान सम्मान निधि सीधा तौर ऊं मदद रे जरिये नान्हा किसानों ने मजबूत बणाया है जद के प्रधानमंत्री फसल बीमा योजना ऊं किसानों ने खेती ऊं जुड़्या भांत-भांत रा जोखिम ऊं निजात मिली है।

000

आज 11वों राष्ट्रीय हथकरघा दिवस मनायो जा रह्यो है। भारत की समृद्ध हथकरघा विरासत ने बचावण सारु ओ दिन मणायो जावे है। ई मौके प्रधानमंत्री नरेन्द्र मोदी जनता ने शुभकामनावां दीनी है। सोशल मीडिया पोस्ट रे जरिये श्री मोदी कह्यो के ओ दिन भारत की समृद्ध बुनाई परंपरावां रो उत्सव मनावण रो है, जो जनता की रचनात्मकता रो दरसाव करे है। ई मौके वस्त्र मंत्रालय की ओर ऊं नई दिल्ली मांय राख्यी ज्या खास कार्यक्रम मांय केंद्रीय कपड़ा मंत्री गिरिराज सिंह हाथ की कारीगरी ऊं बण्या सामान ने दुनिया मांय लोकप्रिय बणावण की अरज कीनी। वे कह्यो के कपड़ा मंत्रालय देश रा बुनकरां ने बचावण सारु काम कर रह्यो है। श्री सिंह कह्यो के मौजूदा दौर की दुनिया मांय गुणवत्तापूर्ण कपड़ा की मांग है अर भारत रो हथकरघा उद्योग ई जरूरत ने पूरो कर रह्यो है।

केन्द्रीय मंत्री बेहतरीन काम करण वाळा बुनकरां, कर्मचारियां अर सामान बणावण वाळी कंपनियां ने संत कबीर हथकरघा पुरस्कार अर राष्ट्रीय हथकरघा पुरस्कार दे र नवाजा। राज्य मांय ई राष्ट्रीय हथकरघा दिवस रे मौके न्यारा-न्यारा कार्यक्रम राख्यी ज्या। जयपुर रा इंदिरा गांधी पंचायत भवन मांय बुनकर सेवा केन्द्र की ओर ऊं राख्यी ज्या कार्यक्रम मांय बुनकर अर हथकरघा हलका ऊं जुड़्या लोग शामिल व्हा। ई मौके हाथ की कारीगरी ऊं बणायी ज्या कपड़ा रो फैशन शो ई राख्यी ज्यो। सवाईमाधोपुर मांय राख्यी ज्या कार्यक्रम मांय बुनकरां ने जरूरी संरक्षण देवण अर वोकल फॉर लोकल रा बारा मांय चर्चा करी ज्यी। ई मौके केन्द्रीय संचार ब्यूरो रा क्षेत्रीय प्रचार कार्यालय की ओर ऊं नौजवानां ने केन्द्र सरकार कानी ऊं चलायी जा रही जनता रा भला की न्यारी-न्यारी योजनावां रा बारा मांय जाणकारी दीरीजी। पाली रा वरकाणा मांय ई ब्यूरो की ओर ऊं कार्यक्रम राख्यी ज्यो।

000

निर्वाचन आयोग उपराष्ट्रपति चुनाव सारु आज अधिसूचना जारी कर दीनी। ई सागे ई नामपाना दाखिल करण रो काम सारु व्हे ग्यो है। पर्चा 21 अगस्त ताई दाखिल कर्या जा सके है। 22 अगस्त ने पर्चा की जांच करी जावेला जद के 25 अगस्त ताई नाम पाछा लिया जा सकेला। 9 सितम्बर ने संवारे 10 ऊं सिंज्यां 5 बज्यां ताई वोट पड़ेला। उपराष्ट्रपति चुनाव सारु लोकसभा अर राज्यसभा रा चुणी ज्या सदस्य वोट देवे है।

000

पशुपालन मंत्री जोराराम कुमावत कह्यो है के राज्य रा आतूणी हलकां मांय पीवण रा पाणी री परेशानी बेगी ई दूर कर दी जावेला। ई सारू माही डेम ने जवाई डेम ऊं जोड़्यो जावेला। श्री कुमावत आज जयपुर मांय खबरनवीसां सागे बातचीत करता थकां कह्यो के इण ऊं पाली, जालौर, सिरोही अर बाड़मेर जिलां री जनता ने फायदो मिलेला।

000

प्रदेश मांय हर घर तिरंगा अभियान रा तैत भांत भांत रा कार्यक्रम राख्या जा रह्या है। जयपुर मांय भारतीय जनता पार्टी रा प्रदेश कार्यालय मांय हर घर तिरंगा अभियान अर विभाजन विभीषिका स्मृति दिवस रा बारा मांय कार्यशाला राखी ज्यी। ई मौके मुख्यमंत्री भजनलाल शर्मा कह्यो के तिरंगा यात्रा रे मार्फत नुवी पीढ़ी ने स्वतंत्रता सेनानियां रो बलिदान याद करावणो है। वे कह्यो के देश रा प्रति लगाव बधावण सारू हर घर तिरंगा अभियान जरूरी है।

बाड़मेर जिला रा डिंडावा री सरकारी स्कूल मांय टाबरियां तिरंगा रंगोली बणा र देश प्रेम रो संदेश दीनो। भीलवाड़ा मांय जिला कलेक्टर अहलकारां ने ई अभियान ने कामयाब बणावण अर इण मांय बत्ता ऊं बत्ता लोगां री भागीदारी तैय करण रा हुकम दीना। युवा मामलात् अर खेल मंत्रालय री ओर ऊं मेरा युवा भारत पहल रा तैत तिरंगा झण्डा ऊं जुड़ी सवाल-जवाब री ऑनलाइन होड़ सरू करी ज्यी है। आप माय भारत पोर्टल माथे ई होड़ मांय शामिल व्हे सको हो। होड़ मांय पहली ऊं 25 वी ठौड़ माथे रहवण वाळां ने सियाचिन रो दौरा करायो जावेला अर होड़ मांय शामिल व्हेवण वाळा सगळा लोगां ने ई-सर्टिफिकेट दिया जावेला।

000

मुख्यमंत्री भजनलाल शर्मा कह्यो है के समाज ने सही दिशा देवण अर देश-प्रदेश ने मजबूत बणावण मांय महिलावां रो खास काम है। वे आज जयपुर मांय वां रा रहवास माथे **‘मुख्यमंत्री संग रक्षाबंधन-मीडिया की बहनों का सम्मान’** कार्यक्रम मांय बोल रह्या हा। मुख्यमंत्री कह्यो के राज्य सरकार आधी आबादी री हिफाजत करण अर वां ने मजबूत बणावणो तैय कीनो है। मुख्यमंत्री कह्यो के लोकतंत्र रो चौथो खम्भो मीडिया, सरकार अर जनता ने जोड़बा रो काम करे है। ई मौके महिला पत्रकार मुख्यमंत्री के राखी बांधी।

000

राज्य सरकार 44 नुवी प्राथमिक स्कूलां खोलण री मंजूरी दीनी है। आ स्कूलां 2025-26 सत्र ऊं सरू मानी जावेला। शिक्षा विभाग आरक्षित शिक्षकां मांय ऊं 2-2 अध्यापकां ने नुवी स्कूलां मांय भेजण रो फैसलो ई कीनो है।

000

राज्य मांय ई चौमासा मांय हाल ताई सामान्य ऊं 69 फीसदी बत्ती बिरखा व्हे चुकी है। प्रदेश मांय बारिश रो सामान्य औसत 255 दशमलव 8 मिलीमीटर है, जद के हाल ताई 433 दशमलव 2 मिलीमीटर बारिश व्हे ग्यी है। ई बीचे राज्य मांय हालांकि बारिश रो दौर मंदो पड़ ग्यो है, पण मौसम विभाग काल ऊं प्रदेश रा उतराद ऊगणी हलकां मांय कठे-कठे मेह बरसबा रा आसार जताया है। 9 ऊं 12 अगस्त बीचे भरतपुर, कोटा, उदयपुर, अजमेर अर जयपुर संभाग मांय कठे-कठे हल्की ऊं मझला दर्जा री बारिश व्हे सके है।

000

अति पिछड़ा वर्ग अर गुर्जर समाज री न्यारी-न्यारी मांगा माथे चर्चा करण सारू आज जयपुर मांय मंत्री समिति री तीजी मीटिंग राखी ज्यी। मीटिंग मांय गुर्जर आरक्षण समिति कानी ऊं सुझायी ज्या न्यारा-न्यारा बिन्दुआं माथे चर्चा पाछे केई खास फैसला करी ज्या। मीटिंग मांय करी ज्या फैसलां रे मुजब गुर्जर आरक्षण आंदोलन ऊं जुड़्या मुकदमा रा बेगा निपटारा सारू आला दर्जा रा अहलकारां री नियुक्ति करी जावेला। शिक्षा अर दूजा महकमां मांय एमबीसी कर्मचारियां री नौकरी पक्की करण अर तरक्की ऊं जुड़्या मामलां रो निपटारो ई कर्यो जावेला। मीटिंग मांय संसदीय कार्य मंत्री जोगाराम पटेल, सामाजिक न्याय अर अधिकारिता मंत्री अविनाश गहलोत अर गृह राज्यमंत्री जवाहर सिंह बेढम शामिल व्हा।

000

संसदीय कार्यमंत्री जोगाराम पटेल पाकिस्तान ऊं आ र लम्बा बगत ऊं जयपुर मांय रह रह्या 10 जणा ने आज भारत री नागरिकता रा कागजात संप्या। ई मौके श्री पटेल कह्यो के नागरिकता रा कागजात मिल्यां पाछे अ लोग ई अब सरकार कानी ऊं चलायी जा रही जनता रा भला री न्यारी-न्यारी योजनावां रो फायदो ले सकेला। नागरिकता प्रमाण पत्र मिलण परा खुशी जताता थकां अ लोग सरकार रो आभार जतायो। ध्यानजोग है के जयपुर जिला प्रशासन री ओर ऊं हाल ताई 340 पाक विस्थापितां ने भारत री नागरिकता रा कागजात संप्या जा चुक्या है।

000

चित्तौड़गढ़ सैनिक स्कूल रो 65वों स्थापना दिवस आज मणायी ज्यो। ई दौरान स्कूल री सरुआत करण वाळा लेफ्टिनेंट कर्नल के.शंकर मेनन री मूरत रो अनावरण करी ज्यो। ई मौके विद्यार्थी आर्ट, क्राफ्ट अर विज्ञान प्रदर्शनी लगायी। ई सागे ई सांस्कृतिक कार्यक्रम ई पेश करी ज्यो। कार्यक्रम रे दौरान शैक्षणिक सत्र 2024–25 मांय अव्वल रेहवण वाळा विद्यार्थियां ने ईनाम दे र नवाजी ज्यो।

000